

# श्री शिव चालीसा

## ॥ दोहा ॥

जय गणेश गिरिजा सुवन, मंगल मूल सुजान ।  
कहत अयोध्यादास तुम, देहु अभय वरदान ॥

## ॥ चौपाई ॥

जय गिरिजा पति दीन दयाला ।  
सदा करत सन्तन प्रतिपाला ॥

भाल चन्द्रमा सोहत नीके ।  
कानन कुण्डल नागफनी के ॥

अंग गौर शिर गंग बहाये ।  
मुण्डमाल तन क्षार लगाये ॥

वस्त्र खाल बाघम्बर सोहे ।  
छवि को देखि नाग मन मोहे ॥

मैना मातु की हवै दुलारी ।  
बाम अंग सोहत छवि न्यारी ॥

कर त्रिशूल सोहत छवि भारी ।  
करत सदा शत्रुन क्षयकारी ॥

नंदी गणेश सोहे तहँ कैसे ।  
सागर मध्य कमल हैं जैसे ॥

कार्तिक श्याम और गणराऊ ।  
या छवि को कहि जात न काऊ ॥

देवन जबहिं जाय पुकारा ।  
तबहिं दुःख प्रभु आप निवारा ॥

किया उपद्रव तारक भारी ।  
देवन सब मिलि तुमहिं जुहारी ॥

तुरत षडानन आप पठायउ ।  
लवनिमेष महँ मारि गिरायउ ॥

आप जलंधर असुर संहारा ।  
सुयश तुम्हार विदित संसारा ॥

त्रिपुरासुर सन युद्ध मचाई ।  
सबहिं कृपा कर लीन बचाई ॥

किया तपहिं भागीरथ भारी ।  
पुरब प्रतिज्ञा तसु पुरारी ॥

दानिन महँ तुम सम कोउ नाहीं ।  
सेवक स्तुति करत सदाहीं ॥

वेद नाम महिमा तव गाई ।  
अकथ अनादि भेद नहिं पाई ॥

प्रगट उदधि मंथन में ज्वाला ।  
जरे सुरासुर भये विहाला ॥

कीन्ह दया तहं करी सहाई ।  
नीलकण्ठ तब नाम कहाई ॥

पूजन रामचन्द्र जब कीन्हा ।  
जीत के लंक विभिषण दीन्हा ॥

सहस कमल में हो रहे धारी ।  
कीन्ह परीक्षा तबहिं पुरारी ॥

एक कमल प्रभु राखेउ जोई ।  
कमल नयन पूजन चहं सोई ॥

कठिन भक्ति देखी प्रभु शंकर ।  
भये प्रसन्न दिए इच्छित वर ॥

जय जय जय अनन्त अविनाशी ।  
करत कृपा सब के घटवासी ॥

दुष्ट सकल नित मोहि सतावै ।  
भ्रमत रहौं मोहि चैन ना आवै ॥

त्राहि त्राहि मैं नाथ पुकारो ।  
यहि अवसर मोहि नाथ उबारो ॥

लै त्रिशूल शत्रुन को मारो ।  
संकट ते मोहि आन उबारो ॥

मात-पिता भ्राता सब होई ।  
संकट में पूछत नहिं कोई ॥

स्वामी एक है आस तुम्हारी ।  
आय हरहु मम संकट भारी ॥

धन निर्धन को देत सदाहीं ।  
जो कोई जांचे सो फल पाहीं ॥

अस्तुति केहि विधि करैं तुम्हारी ।  
क्षमहु नाथ अब चूक हमारी ॥

शंकर हो संकट के नाशन ।  
मंगल कारण विघ्न विनाशन ॥

योगी यति मुनि ध्यान लगावैं ।  
नारद शारद शीश नवावैं ॥

नमो नमो जय नमो शिवाय ।  
सुर ब्रह्मादिक पार न पाय ॥

जो यह पाठ करे मन लाई ।  
ता पर होत हैं शम्भु सहाई ॥

ऋनिया जो कोई हो अधिकारी ।  
पाठ करे सो पावन हारी ॥

पुत्रहीन कर इच्छा कोई ।  
निश्चय शिव प्रसाद तेहि होई ॥

पण्डित त्रयोदशी को लावे ।  
ध्यान पूर्वक होम करावे ॥

त्रयोदशी व्रत करे हमेशा ।  
तन नहीं ताके रहे कलेशा ॥

धूप दीप नैवेद्य चढ़ावे ।  
शंकर सम्मुख पाठ सुनावे ॥

जन्म जन्म के पाप नसावे ।  
अन्तवास शिवपुर में पावे ॥

कहत अयोध्या आस तुम्हारी ।  
जानि सकल दुःख हरहु हमारी ॥

## ॥ दोहा ॥

नित्त नेम कर प्रातः ही, पाठ करो चालीस ।  
तुम मेरी मनोकामना, पूर्ण करो जगदीश ॥

मगसर छठि हेमन्त ऋतु, संवत चौसठ जान ।  
स्तुति चालीसा शिवहि, पूर्ण कीन कल्याण ॥

– संत अयोध्यादास